

Il zenn pign da Vrin sin viadi

DAD AUGUSTIN BEELI / ANR

■ **El clutger dalla baselgia parochiala da Vrin pendan quater zenns. Per ordinar ei quei aschia dapi tschentaners. Actualmein eis ei mo treis. Il zenn pign, culaus igl onn 1394, ei sin viadi ell' Austria.** Tenor il cudisch dils zenns, edius il 2015 da *Pieder Caduff*, ein en Surselva 459 zenns en funcziun. Els tuccan reglarmein gi per gi en 72 baselgias e 108 capluttas. Quater da quels ein a Vrin. Margis vargau han il tecnicher *Jeremias Wicki*



Aschia sepresentava la situaziun: Il zenn da 625 onns haveva piars il battagl. FOTO A. CAVIEZEL

e siu gidonter dalla firma MuriBaer retschiert in'incumbensa unica. Els han giu da viagiari dil cantun Lucerna tochen entadem la Lumnezia per menar en reparatura in zenn da 625 onns. El clutger dalla baselgia parochiala da Vrin han els pendiu giu dil tuchiez il zenn pign.

Lacziun preparada igl avonmiezgi ei stada fatga spert. Enteifer strusch treis quarts d'ura han els fatg la lavur che pareva dètg delicata. Els han priu il zenn da strusch 170 kilos giu dil giuv, mess el sin ina schirella e schau giu el culla suga to-

chen sil plaz davos baselgia. Il zenn pign ei defects e drova ina reparatura. Entgins habitonts attents havevan s'encurschiu che quei zenn tuccava tuttenina «da vit». Zacu fuva il fier, respectiv il crutsch nua ch'il battagl ei fermaus, ruts giu. In'inspeziun sin clutger ha mussau ch'il crutsch fuva daus ora ed il battagl curdaus sil plantschii dil clutger. Exact 625 onns ha quei zenn historic tuccau. Tenor l'inscripziun gotica sil zenn ha in «magister Anoriolus de Lugano» culau el. Las cefras romanas MCCCXCIII confir-

man che quei meister ha culau il zenn igl onn 1394. Il medem meister Anoriolus de Lugano ha culau tschun onns pli tard il zenn che tucca ella baselgia da s. Gieri a Castrisch. Igl ei buca cumprovau sch'il culader ei vegnius a Vrin per cular il zenn ni sch'ins ha transportau quel naven da Ligiaun sur la Greina.

Perinagada ei il zenn viagiava quella gada dalla Val ora. Per l'emprema gada dil reminent suenter 625 onns. Il zenn pign da Vrin ha fatg l'emprema etappa dil viadi da reparatura. L'interpresa MuriBaer vegn a far las empremas lavurs, lu sto el denton ir ella cularia ora el Tirol. Da Büron vegn el transportaus ad Puntina (Innsbruck) tier la firma Grassmayr. Igl ei ina cularia da zenns ch'exista dapi 1599. Igl ei l'interpresa-mumma dalla cularia Grassmayr Feldkirch/S. Pieder el Vorarlberg. Da leu derivan 23 zenns che pendan en baselgias e capluttas dalla Surselva. Il zenn pign historic da meister Anoriolus retuorna puspei a Vrin. Anavos dil Tirol retscheiva el igl emprem aunc in niev battagl. Sco quei che *Armin Caviezel*, commember dalla suprastanza dalla pleiv Lumnezia, ha confirmau all'anr vegn il zenn pendius danovamein en clutger en paucs meins. Entochen ch'el maunca vegn il zenn mesaun a surprendre ses pensums. El vegn a tuccar el cass ch'ei havess da dar batten a Vrin. Pli baul fuva ei usit ch'il zenn pign tuccava per annunziar il batten da mattatschas ed il zenn mesaun tuccava pil batten da buobs.



Cun agid dil mir-baselgia e d'ina liunga trav eis ei iu spert da cagar il zenn ella camiunetta. FOTO A. BEELI